

DELHI MIZO INKHAM



BEIHRUAL 2024

ZIRLAI : I PETERA

BUATSAIHTUTE:

Rev. Varrosanga      Dr. A. Zothansanga

Dr. Rozamliani

# DELHI MIZO INKHAWM

Beihruai 2024

THUZIR:

**PETERA**

**LEHKHATHAWN PAKHATNA**

**Buatsaihtute:**

Dr. A. Zothansanga  
Dr. Rozamliani  
Rev. Varrosanga



**NEW DELHI**

Delhi Mizo Inkhawm  
Beihruai 2024 Zirilaibu – Peter Lekhathawn Pakhatna

©2024. The Mizo Christian Fellowship, Delhi

a thlawna sem  
*distributed gratis*

Published by the Media & Publication Sub-Committee,  
Delhi Mizo Inkhawm

# THUHMA

Delhi Mizo Inkhawm chhungkuaten Pathian khawngaihna avangin Beihrial 2024 kan lo thleng leh ta. Kumin 2024 Beihrial thuzir atan DMI Committee chuan **Petera Leikhathawn Pakhatna** a thlang a, a bu siamna kawnga hma la turin Sub-Committee a din bawk a.

Zirlai ziaik leh a bu siam hi thil awlai a ni lo va. Amaherawhchu, kan aiawhin Dr. A. Zothansanga te, Dr. Rozamliani te leh Rev. Varrosanga ten zirlaibu ðha tak mai, an hun ðul leh buai tak karah min ziaik sak thei a. Zirlai chhiar nuam, hlawk thlak leh zir chakawm tak mai, Thlarau Thianghlim ðanpuinaa an lo peih thei ta hi a lawmawm em em a ni.

Beihrial 2024 kan hmanna aþang hian hian kohhranhote Pathian thu hriatnaah lo ðhingin, kan thu hriatte nunpui a, a taka hmang zelin, Isua Krista anna kawngah hmasawn zel ila tih hi kan ðawngþaina leh kan induhsakna a ni. Inkhawmna hmun hrang hrang leh Bialah te uluk taka chhiar chhuakin, zirho ðheuh ila. Beihrial a nih ang taka mi bote Krista hnena hruaina leh infuihtawnaah Pathian ðanpuina dil chungin ðan i la thar ðheuh ang u.

Lalpan kohhranhote min zirtirin, mal min sawm ðheuh rawh se.

Media & Publication Sub-Committee  
Delhi Mizo Inkhawm

## ZIRLAI THEN DAN

<b>Zirlai</b>	<b>Date - Day</b>	<b>Thupui</b>	<b>Phek</b>
1	September 01, Pathianni	Thuhma Leh Chibai bukna (1 Petera 1: 1, 2)	1- 4
2	September 07, 2024, Inrinni	Ringtute Chanvo Hlutzia (1 Petera 1:3 – 12)	5- 6
3	September 08, Pathianni	NunThianghlim NeiTura Sawmna (1 Petera 1:13 – 25)	7- 9
4	September 14, Inrinni	ThlarauvaThan len Leh Ringtu Nihna (1 Petera 2: 1- 12)	10- 11
5	September 15, Pathianni	Ringtu Nun: Roreltute Hnena Intukluh Leh Isua Anga Tuar (1 Petera 2:11 – 25)	12- 13
6	September 21, Inrinni	Nupa Nun Leh Ringtute Nun Dan Tur (1 Petera 3: 1- 12)	14- 15
7	September 22, Pathianni	Isua Anga Thiltha Atana Tuar (1 Peter 3:13 – 4:6)	16- 17
8	September 28, Inrinni	Kristian Nih Vanga Tuar (1 Pet 4:7-19)	18- 20
9	September 29, Pathianni	Pathian Beramte Leh Berampu (1 Peter 5:1-4)	21- 23

**ZIRLAI 1-NA**  
**THUHMA LEH CHIBAI BUKNA**  
**(1 PETERA 1: 1, 2)**

Petera hian Isua Krista tirhkohe, a tuarna hretu (5:1) tiin a inchhal a. He lehkhathawn a ziahnaah hian Silvana'n a pui a. An ziah lai hian Marka an bulah a awm ve a ni (5:12-13). Mahse tun hnuah hian Petera ziah ani lo vang ti a hnialtute an lo awm ta tlat mai a. Petera ziah ani lo ang an tihna chhan langsar zual pahnih leh a chhanna te ngaihtuah ho lawk ila.

1. Tirhkohte Thiltih 4:13-ah chuan, '*Petera leh Johana huaizia chu an hmubin, lekhbathiamlo leh mi mawl mai an ni tih an briatin mak an ti ble a;*' tih kan hmu a. He lehkhathawn hi Greek țawng style changkang leh sang taka ziah a nih avangin engtin nge mi mawl sanghamantu mai khan a ziah thiam ang tih zawhna a awm ta a ni. Amaherawhchu, history-a kan hmuh angin khatih hun lai khan Aramaic leh Greek țawng te hi an khawlai țawng hman ve vete a ni a. Petera pawh Kapernaum khuaah ei zawngin a khawsa ve țhin a, an khua Kapernaum hi sumdawwna hmun pawimawh ve tak, mi tam tak luhchhuahna hmun a nih avangin Greek țawng hi chu nal takin a thiam ve ang tih rin a ni.

2. He lehkhathawna ringtu an nih avanga an tawrhna chungchang in ziate hi ram hruaitu /sorkar ațanga tihduhna a ang hle a, entirnan 4:14-16 angte hi. Mahse, hetiang tihduhna lian tham hi chu Petera thih hnuah chauh thleng a ni si a, chuvangin Petera ziah a ni thei lovang ti pawl an awm ve leh a. Mahse, Pathian thu zirni tam zawk ngaihdanah chuan heta tawrhna Petera ziahte hi ram hruaitute ațanga ringtu nih hrim hrim avanga tihduhna leh hremna ni lovin țhenawm khawvengte ațanga enhranna, sawichhiatna leh elsenna te a ni mah zawk a ni. Chu chu Bible hmun dang Tirhkohte Thiltih **13:50; 14:5,19; 16:19-24; 17:5,13; 18:12-13; 19:23-29** te kan en chuan a inmil hle a ni.

**A ziah hun:** AD 64 July thlaah ni 9 chhung tak meuh Rome khawpui chu a kang a. Chuta tikangtu chu Kristiante an ni tiin Nero chuan a puh a. Chu puhna chuan Kristiante tihduhdahna a tichhuak ta a. Hemi tuma

tihduhdahna chhuakah hian Petera hi a martar ta niin ngaih a ni a. Chuvangin 64 AD hmaa ziah a ni.

**A ziahna khua:** Babulon aṭanga ziaḱ angin Petera hian a in sawi a (5:13) chu chu Rome khawpui sawinaa ngaih a ni. Bible hmun dang Thupuan 16:19, 17:5, 18:2 te kan en chuan Babulon tih chu khawvel ram lalna leh rorelna hmunpui leh Pathian mite dona leh nekchepna khawpui sawina a ni a. Thuthlung Thar hunah chuan chu chu Rome khawpui nihna chiah a ni. Tin, Petera te hunlai hian Babulon khua Mesopotamia khuaa mi Thuthlung Thua kan hmuh ram hi chu a tlu chhiain, a ram deuh vek tawh a, mihring cheng pawh an awm mumal tawh lo a ni.

**Tute hnena thawn nge:** Asia minor khuaa ringtute, an rinna avanga ensan/enhran te hnena thawn a ni.

**Bung 1:1-2:** Petera'n a lehkathawn dawngtute a kohna ṭawngkam pathum hi han tarlang ta diat diat ila.

1. Thlante (*chosen/elect*)
2. Hnawhchhuah; Vakvai(*exile/alien*)
3. Darhho (*scattered/dispersed*)

Heng ṭawngkam pathumte hi Thuthlung Hluia Pathian mite sawina kan hmuh ṭhinte an ni. Israel hnam chu wavi tam tak Pathian thlante an ni tih kan hmu ṭhin a (Deut 7:6-8; Isaia 41:8-9). Thuthlung Tharah erawh chuan ringtute hi 'thlante' tia koh kan ni ta zawk a ni (Rom 8:33; Kol 3:12; 2Tim 2:10). Thlante chu ama mite; awm dan leh nih dana ama tana hrang leh danglama awm tura thlan/koh te an ni (1 Pet 2:9). An danglamna tur chu an thianghlimnaah a ni a, an mizia leh nungchangah anmahni Kotu (Isua) chu an lo ang telh telh tur a ni (1:13-21).

Vakvaite tih leh Darhte tih hian mahni ram nilo hmun danga tihluihna emaw mahni duhthu ngeia khawsa mekte a sawina a ni a. Kan ram/in tak tak chu vanram a ni a, mahse, leiah hian kan la vakvai ṭhin tia hrilhfiah an awm a. He khawvela kan chen chung hian, khawvel kalphung (system leh culture) tam tak te ang hian kan nungin kan zawm

ve thei lo va, chumi avanga en hran leh tel ve lo, a huang pawna mi anga ngaih kan ni thei a ni tia sawi fiahna pawh a lar hle.

Helai chang hnihte hian Pa, Fapa leh Thlarau thianghlim min kawhhmuh kim vek a ni. Pa Pathian chuan a hriat lawk anga thlante a nei a, chumite chu Isua Krista zarah Pathian thuawih thei tura din an ni a. Hriat lawk tih hi Pathian hian thil thleng tur hi a hre lawk tihna mai a ni lo va, engkim mai hi ama remtih leh ama rorelna hnuaiah a phalnain a thleng tihna a ni. Lekhathawn chhiartute tana fuihna pahnihte (a) Pathian hian an harsatna tawh mekte hi a hriatpui a ni. (b) An harsatna tawh mek hian Pathian chu a barakhaih lo va; a chhandamna ruahmanna chhunga mi tho a ni. Isua Krista pawh chawimawia a awm hmains tawrhna a kal tlang hmasa a, chutiang chiah chuan Pathian chhandamna leh thiamchantirna famkim an chan hmains tihduhna hrang hrang an kal tlang ve a ni.

*Awih tur leh Isua Krista thisen theh dawng tura thlarau tibhran,* tih hi Petera hian Exodus 24:3-8 behchhanin a ziak a. Israel hnam chuan Pathian nen thu an thlung a; a thupekte an zawm ang tiin an intiam a. Chu an intiamna chuan thisena inthawina a keng tel a, ran thisen chu maichamah leh mipuiteah chuan theh a ni a. Chu thisen theh avang chuan mipuite chu an thianghlim tawh tih leh Pathian thuthlung chu nemngheh a ni tih a entir a. Hei hian Isua Krista thisen a lo entir lawk a ni.

Hetianga a nih avang hian Pathianin thlante a neihna chhan chu ama mite ni tura Isua krista thisena tlen fai, Thlarau Thianghlim hruaina avanga ama thu awih thin, mi hlang a duh avang a ni. Engpawh kan chungah lo thlengin, kan rinna avanga kan tuar chang pawh awm se, Pathian chatuan thil tum hi engmahin a dal thei lo a ni. Chutianga a fuih mekte hnenah chuan Pathian khawngaihna leh thlamuanna tihpunin lo awm rawh se tiin a ziak a. Hun harsa an kaltlang lai hian Pathian khawngaihna leh a thlamuanna an mamawh em em tih a hriatchian pui hle a ni ngei ang.

## **Sawihō Tur:**

1. Petera chanchin hi Chanchin T̄ha bu pali Matthaia, Marka, Luka leh Johana leh Tirhkohte Thiltih aṅangin kan hmu a. Heng bu panga aṅanga Petera chanchin i hriat atang hian a lekhathawnah hian eng lampang nge ziaḱ a, eng thute nge a chaha i rin?
2. Bible-ah hian Isua zirtir 12-te chanchin hi a chuang tlem hle mai a. Bible bu zingah pawh heng mi pathum, Petera, Johana leh Matthaiaṅ lehkhā ziaḱte chauh hi a chuang a. Eng vang nge ni a i hriat? Anmahni ai mahin Paula, Barnaba, Timothea, Tita-te leh Lalpa unau Jakoba-te hming a ri zing zawk tlat hi eng tianga hriat thiam tur nge ni ang?

**ZIRLAI 2-NA**  
**RINGTUTE CHANVO HLUTZIA**  
**(1 PETERA 1:3 – 12)**

Petera hian a lehkhathawn hi Pathian chawimawina (*doxology*) in a ãan a. Heta Pathian a chawimawina ãawngkam hi Judaten Thuthlung Hlui hun laia an hman lar em em a ni. Petera hian hetiang chawimawina hi Pathian leh a Thutak a hriat chianna aãanga sawi chhuakin; Isua Krista thawh sa rin avang chauha chhandamna hi chan theih a ni, a ti a ni.

**Kristaa nun thar:** Heta Petera'n Kristaa nun thar a sawi hi amah Isua ngeiin Johana 3:3-7-a Nicodema hnena, *mi tupa-wh tuiah leh thlarauva an pian loh chuan Pathian ramah an lut thei lo ang*, a tih nen khan thil thuhmun an sawi a ni. Hei thu Thuthlung Hluia a beh chhanna chu Ezekiela 36:25-27 hi a ni a. A awmzia chu Pa Pathian chuan a khawngaihna nasa tak avangin Krista thawhleha azarah nun thar (piantharna) nei turin min hring a. Chu nun thar neitu chuan thlarauva nun thar a neih mai bakah, Thlarau Thianghlim zarah khawvela a tisa nun hi siam tharin a awm mek a, a awm zel dawn bawk a ni. Chu nun thar chuan thil pathumah min hruai lut:

1. **Beiseina nung:** Ringtute beiseina hi Krista thihna hneha tho leh, tuna nunga Pa ding lama kan aiawha ãthu ta avanga nei leh chang kan nih avangin, kan beiseina hi awmze nei lo, thil thi ni lovin, beiseina nung a ni.

2. **Rochan chhe thei lo:** He rochan chhe thei lo hi vanramah Pathianin tunah amah an rin avanga tuar mekte tan hian a vawng him a ni. Chu rochan chu an chan ngei theihna tura veng hima anmahni enkawl tlat tintu pawh chu amah Pathian tho a ni.

3. **Chhandamna famkim:** He lehkhathawn chhiartute hian tihduhdahna leh sawichhiatna te an tuar mek a. Tin, leia cheng an la nih avanga, chumiin a ken tel natna, damlohna leh harsatna chi hrang hrang te an tawk ãhin a ni. Mahse tawpna niah chuan chung zawng zawng chu a bo tawh ang a, Pathianin chatuana amah nena nung turin an taksa ngei

a la kaitho leh dawn a ni. Chu chu a ni chhandamna famkim kan nghah tur leh min tichhel tlattu tur chu.

### **Engvangin nge Ringtuten tawrhna an kal tlang?**

Isua Krista rawn inlar leh huna fakna, chawimawina leh ropuina tur a lo nih theihnna tiin Peteran min hrilh a ni. An tawrhna chu fiahna meipui a ni. Heng fiahna meipui pawh hi lawm tak chung a kal tlang theih avangin, an rinna ngheh zia leh tak zia ti lang chiangtu a ni tel baw a ni. Petera lehkhathawn chhiartuten an mitin Isua hi an hmu lo a, mahse an ring a, an hmangaih tlat a. Isua khan Thoma hnenah khan, '*Nang chuan mi hmuh avangin i ring a, hmu lova ring apiangte chu an eng a thawl e,*' a ti a. Engthawl a tih hian nek chepna leh tihduhdahna kara an lawm thei tlat hi a kaw k tel ve ngei ang le.

### **Chhandamna chanchin an zawng a, ngun takin an chhui thin:**

Luka 24:27-ah chuan Emmau khuua thian dunte hnenah khan Isua'n, '*Mosia leh zawlneite zawng zawng lekhbaah a fan a, ama chanchin ziaik apiang chu anmahni a hrilhfiah zel a,*' tih kan hmu a. Thuthlung Hlui bu leh zawlneite hian min kawh hmuh tum leh goal an pet luh tumna chu Isua Krista tawrhna leh ropuina (thawhleha) avanga chhandamna kan chan hi a ni. Isua krista thihna leh thawhleha avanga mihringte chhanchhuahna plan lo thleng fel ta mai hi a hluin a ropui lutuk a, vantirhkohte pawhin bih chian ve an duh a ni tiin a sawi a ni.

### **Sawihho Tur:**

1. 'Beiseina nung' tih hi enge a awmzia ni a i hriat? Beiseina nung lo a awm thei em? Beiseina nung chu i nei em?
2. Isua min chhandamna chungchang hi Vantirhkohte paw'n hriat chian an duh, tih a ni a. Chu chhandamna chu i chang em? Eng tiang chiahin nge i hlut nia i inhriat?

**ZIRLAI 3-NA.**  
**NUN THIANGHLIM NEI TURA SAWMNA**  
**(1 PETERA 1:13 – 25)**

**1 Petera 1: 13-21** thu hlawm hi Bible ziaktuten an hman fo thin *Chiasm* an tih mai zulzui/*style*-a ziah a ni a.

**A.** Ringtute Beiseina (ch. 13)

**B.** Isua Krista Inlarna/Puanzarna (ch.13)

**C.** An Tunhma Nun sualte hriat nawntir (ch.14)

**D.** Thianghlim tura fuihna Pathian thianghlim fate kan nih avangin (ch.15-17)

**C.** An Tunhma Nun sualte hriat nawntir (ch.18-19)

**B.** Isua Krista Inlarna/Puanzarna (ch.20)

**A.** Ringtute Beiseina (ch.21)

Hetiang style a a in ziah reng reng chuan thupui/thusawi in ang kha wavi hnih an ziaa a, mahse darthlalang a hlimthla (mirror image) angin an in chhep a. Chumi lai takah chuan a thupui ber hre fiah se min tih em em (a thuhlawmin min hruailuh a tumna) chu an phum thin a ni (D). Hetianga ziah hian hriatfiah te, hriat reng te a awl a ni.

**A.** Isua Krista hi leiah a lo let leh ngei ngei dawn avang leh mitthi zing ata kai thotu Pa Pathian ringtute kan nih avangin beiseina kan nei a ni. Chuvangin kan rilru ngaituahna te thlarau lam thila min tisawt lo thil aţangtea inthiarfihlim turin ţan kan la tur a ni.

**B.** Isua Krista hi leilung pian hma tawhin min tlan turin ruat lawk ni mahse hun hnuhnungah chauh a rawn inlar a ni. Hriat zauna atan, hun hnuhnung (last days/times) tih Bible-a kan hmuh hian Isua lo kal hmasak aţanga a lo kal vawihnihna tur hun inkar zawng zawng hi a huam

vek a. A lo kal vawihnihna tur hi chu hun hnuhnung ni lovin Hun tawp (end time) tiin Bible ziaktute hian an ziaak thin a ni.

**C.** An tunhma nun sualte chu chang tarlante atang khian kan hre thei ang.

**D.** Hei hi a thu laimu leh pawimawh lai min kawhhmuh leh hmuh fiahtir a tum lai chu a ni ta a. Lev 20:26-ah, *kei Lalpa hi ka thianghlim a, nangni pawh in thianghlim tur a ni, ka pual bik atan hnam dang zing ata ka thlang chhuak (ti hrang) che u a ni, tih kan hmu a.* Israel hnamte kha Thuthlung Hluiah khan Pathian thlan/tih hran an nih avangin an thianghlim tur a ni. Chutiang chiah chuan Thuthlung Thar ringtute hi hnam thlan, Pathian ta bik (1 Pet 2:9-10) kan nih avangin kan nun dan leh miziaah te hian kan Pa mizia leh a nihna (thianghlimna) chu kan tarlang ve tur a ni. Mahse kan zingah tuin nge, 'ka thianghlim famkim,' ti thei awm ang le? Heta kan hriat tur chu Isua phenah kan ding ang a, a ma thianghlimna chuan min hliahkhuh ang. Chutah Pathian thlarau hruai leh zirtir theiha awmin, nitin Isua anna kawnga thanglian tura thuawih leh taihmak chhuah hi kan mawhphurhna a ni.

**1 Petera 1: 22-25:** Pathian Thu hian thil a tithei a; min tithianghlimin ringtute inhmangaih tawn thei turin min kaihruai a ni. Petera chuan kan rilru leh thlarau (soul) min tih thianghlim avang hian tih takzet leh thinlung takin kan inhmangaih thei a ni a ti a. He Pathian Thu hi chi chhe thei lo, chatuan thu nung anih avangin nun thar min kawhhmuh /petu a ni.

*Mi zawng zawng hnim bring ang an ni; an ropuinate pawh hnim par ang a ni; hnim chu a vuai a, a par chu a tla a, Lalpa thu erawh chu chatuanin a awm reng a ni.*

**Sawihō tur:**

1. Ringtute hi thianghlim tura koh kan ni a. ‘Thianghlim’ tih hi eng nge a awmzia nia i hriat, nun thianghlim nei tur chuan eng tianga nun tur nge ni ang?
2. Bible-in, ‘Lalpa thu erawh chu chatuanin a awm reng a ni,’ a tih hi han sawi zau teh? Eng thilte nge chatuana awm reng lo tur chu? A eng zawk nge i buaipui ber thin? Lalpa thu, awm reng tur, hlu tak mai hi a phu tawk hun pein i buaipuiin i inhria em?

**ZIRLAI 4-NA**  
**THLARAUVA ṬHAN LEN LEH RINGTU NIHNA**  
**(1 PETERA 2: 1- 12)**

**Thlarauva Ṭhan len (2:1-3):** Thlarauva ṭhang lian tur chuan sualna zawng zawng kan bansan zel a ngai. Isua kan rin a, kan pianthar chiah hian nausen pianghlim ang kan ni a, ṭhang lian tur kan ni. Ṭhang lian zel tur chuan thlarau lam hnute, engmah pawlh loh, Pathian Thu (1:23) châk tur kan ni. ‘Châk’ tih thumal hi Sam 41:1-a, ‘Sakhi luite tui châka a thaw huam huam ang hian,’ tiha châk tih ṭawngkam kha a ni. Nausen rilṭamin nu hnute tui a chak ang nen a tehkhin theih bawk. Heta ‘nausen pianghlim’ tia a sawi leh bung 1 chang 23-a ‘piangthar’ a tih hi thil thuhmun, Isua ringtu sawina a ni. Kan nun dan pangngai, khawvel mite nun dan aiin Isuan nun min pek hi a tha zawk a ni tih kan tema (*taste*) kan chian zel a ngai bawk. Kan hman lai reng thil hi a danga kan thlak chuan a thlakna hi a ṭha zawk a ni tih kan chian a ngai ang hian.

**Thlarau In (2:4-8)** Ringtute awmho, kohhran hi Pathian chenna hmun, Thuthlung Hluia temple an sak ṭhin ang hian Pathian Thu hian min sawi fo mai. Isua hi ‘lung nung’ a ni a, amah nena kan inzawmin Pathian chenna ‘mi nung’ kan ni a. Tichuan thlarau in ropui taka lungrem kan lo ni ta a ni. Temple-a Pathian hnena inthawina hlantu puithiam thianghlim chanvo pek kan ni. He Pathian in sakah hian a lungphum inngahna chu Isua a ni. Isua ringtu tan chuan Pathian in nih leh chanvo min pek hi thil hlu ber a ni a, a awih lote tan chuan tlukna mai a ni. In sakna tura lung an duh loh an hnawl ang mai hian Isua hi hnawk an tih a, an hnawl thin avangin.

**Mi Thlan (2:9-10)** Thuthlung Hlui hun laia Israel fate Pathian hnam Thlan an ni ang khan, tunlai huna Isua ringtute chu chi thlan, lal puithiam (Pathian be theitu), hnam thianghlim, Pathian mite kan lo ni ta a. Ephesi 1:4-ah chuan he Isuaa kan chan vo hi, ‘leilung pian hmian Kristaah min thlang,’ a ti. Engmah a siam hma-in Isua ringtute nihna leh chanvo hi Pathian lo ruahman lawk thil a ni a, Israel fate khan a hlimthla an chang mai a lo ni tih min hrilh a ni. Heng kan chanvo zawng zawng hi Isua inhlanna avang chauha nei kan ni.

**Mikhual leh Khualzin (alien and stranger, sojourner 2:11-12)** Isua kan rin avanga Pathiana kan chanvo hi a hlut em avangin thlarauva kan than lenna min daltu chu kan bansan zel tur a ni. Khaw ropui zawk hawna tur nei rilru puin dik lo takin kan inchhek muk tur a ni lo va, sual lamah kan in tihnawksak tur a ni lo va, kan chetzia zawng zawngah Isua ang tura than lianin, miten keimahniah Pathian hmel an hmuh theihna turin kan nung tur a ni. Thua sawi chhiatin, misual thanin than mah ila kan thil tih thatte an hmuhin Pathian nen intawkin amah an chawimawi thei dawn a lo ni.

**Sawihon tur:**

1. Thlarau than lenna tura kan tih theih hrang hrangte sawi ho ila.
2. Pathian Thu, Bible-in ringtute chanvo a sawi, chi thlan, Lal puithiam, hnam thianglim, Pathian mite tihte hi han sawi fiah teh. Heng zingah hian eng hian nge i rilru la a, ropui i tih? Chu chu eng tiangin nge i nun chhuah pui theih ang?

**ZIRLAI 5-NA**  
**RINGTU NUN: RORELTUTE HNENA INTUKLUH LEH**  
**ISUA ANGA TUAR**  
**(1 PETERA 2:11 – 25)**

**Roreltute hnena intukluh (in submit, 2:11-17):** Ringtute hi roreltute thu zawma an hnena intulut tur kan ni. Petera ziaak hunlai hian Juda firfiak, *zealot* pawl an tihho vanglai a ni a. ‘Pathian chauh hi kan chungalal leh roreltu a ni, ama thu chauh zawm tur kan ni a, a hnenah chauh chhiah pawh chawi tur kan ni,’ ti pawl an ni. Petera’n he lehkhathawn a ziah lai hi Nero-a Rom lal a nih lai (AD 54-68), Kristiante an chep em em chhoh lai a ni. Rawng takin Kristiante chungah che thin mahse Rom sawrkar lalna hi Petera hian a pawm(*recognize*) em em a ni. Isua ringtu kan nih avang takin, *Lalpa avang chuan mibring ruat apiangte bnenah intulut rawb u*, min ti a ni. Kan nun dan hmanga Chanchin Tha hril tur kan ni tih hi kan chiang tur a ni. Isua kan rina zalen kan nihna chu duh duh tih nan, soal sawimawi nan, soal tura zalenna’n kan hmang tur a ni lo. Pathian thu zawm tura thil dik leh tha ti a, hmlalam pannan kan hmang zawk tur a ni. Roreltute kan zah loh a, an thu kan zawm loh chuan anmahni ruattu Pathian kan ñih lo tihna a ni zawk. Zah tur kan zah a, ñih tur kan tih a, chhiah chawina tura kan chawi zel hi a Pathian thu em em a ni.

**Kan pu/Master-te hnena intukluh (2:18-20):** Kha tih hun laia bawih (*slave*) leh chhiahhlawhte (*servants*) Isua ringtu an lo nih chiah khan an pute milem biaknaa tel a rem ta ñhin lo va, an zinga tam takin tihduhdah, vuak leh hrem an tuar nasa ñhin a ni. Miin a soal vang ni lo va Pathian duh loh zawng a hriatna avanga a tuar chuan chhel taka tuar turin a fuih a ni. Tunlai khawvelah chuan min ruaitu, min chhawrtute nena kan inkar thu-ah (*employer-employee relationship*) kan la lut thei awm e.

**Isua anga tuar (2:21-25):** Thil tha ti reng chung sia kan lo tuar ta a nih chuan Isua angin kan tuar a ni dawn a lo ni. Isuan thil engmah a tisuall lo va, eng thu mah a sawi soal lo, Pathian duhzawng a ti a, a zirtir ñhin. Chuti chung chuan a tuar a, misual thihin a thih phah a ni. Chu tak chu keinin chhandamna kan chan theihna kawng a lo ni si. Miten an sawi

chhiat laiin a chhang let lo va, a tuar laiin a vau let hek lo, a rilru pawh a ngawi a ni. Pathian hnenah a intulut mai zawk a ni. Hei hi a ni kan entawn tur a hnutchhiah chu.

**Sawihó utr:**

1. Roreltute thu leh Pathian thu a inkalh chuan Pathian thu zawk zawm tur kan ni tih chu thil chiang sa reng a ni. Sawrkar hian, ‘Chawlhni, Sunday hi hnathawh ni ni tawh rawh se,’ emaw, ‘Biakinah hian in hmukhawm tawh suh u, mimal inah chauh inkhawm tawh rawh u,’ ti ta se Pathian thu kalh an ni em? (Lungawi takin) kan zawm thei ang em?
2. Intulut - in *submit* tih hi i hriatthiam dan han sawi teh.

**ZIRLAI 6-NA**  
**NUPA NUN LEH RINGTUTE NUN DAN TUR**  
**(1 PETERA 3: 1- 12)**

**Nupa nun dan tur (3:1-7):** *Chutiang bawkin nangni nute u, in pasalte thu awih rawh u; chutichuan, an zingah Pathian thu awih lo an awm pawhin, thu hrilh kher ngai lovin in chêt dân chuan a hneh mai ang, anmahni ngeiin ãih tak chung a in chêt dân thianghlim chu an bmu dâwn si a (1 Pet 3:1, 2).*

‘Chutiang bawkin’ a tih hian bung 2 lama ringtu tupawh roreltu mihring ruat apiangte hnena intulut tura a tihna te, chhiahhlawhte chu an pute thu thua awm tura a tihna leh entawn tur Isua kan neih thu a sawi a chhunzawm zel tihna a ni. Heng zawng zawng hi ‘Lalpaah’ tih a ni. A awmzia chu pasalte thua awm tura a tihna hi an pasalte nihna leh awm dan lamah a innghat lo va, anmahni, nupuite chu Isua ringtu an nih vang zawk a ni. Thiltihah mai ni lo, rilru lamah pawh intulut thlap tur tihna a ni bawh. Isua hi Pa Pathian hnenah a intulut thlap a, chu mai bakah leia a nu leh pa thu thu-in a awm ang khan (Luka 2:51). ‘In pasalte’ tih hian mipa chungnunna lam a kawh lo va, chhungkuaa hming tumtu, chhungkaw lu chu chhungkaw pa ber hi a ni tih lam zawk a ni. Nupuite chu ãawng chhuakin thu sawi lo mahse, Pathian ãih vanga pasalte zah tak si, nun dan thianghlim chuan an pasalte, ringlo mite pawh ni se, hnehin an awm thei dawn a ni.

Pathian mithmuha hlu chu; pawn lam incheina, sam chei leh rangkachak ãih, thawmhnaw man to aiin chungh rila mize dik tak, rilru zaidam leh nunnem, thuhnairawlh, inthumna chhe thei lo hi a ni. Chung mite chu Pathian ringtu, hlauh nei ngai lo Sari fate an ni. Inchei loh tur tih lam aiin nun dan hi Pathian hmuhah pawn lam incheina aiin a pawimawh zawk tihna a ni. Pawn lam lan dan hi kan nihna tak a ni lo va, chhunglam nun zawk hi a ni.

Chutiang bawkin pasalte pawn nupuite chu taksa lama chak lo zawk an ni a, Pathian thutiam dawngtute ãeuh an nih hre rengin an chawimawi tur a ni. Chutiang mi ãawngtaina chuan Pathian hnen a thleng ãhin.

**Ringtute Nun Dan Tur (3:8-12)** *A tâwp berah chuan, in za-in rilru hmun khat pu ula, inlaintin unau angin inhmangaih tawn ula, inkhawngaih tawnin thubnuairawlh takin awm rawh u; sual sualin thungrul sub ula, anchhia pawh anchhiao thungrul lovin, malsawm hlaub zawk rawh u; malsawmna dawng turin asin Pathianin a koh che u.* (1 Peter 3:8-9).

Ringtute hi Pathian malsawmna dawng tura koh kan ni. Thil tha lo, dik lo sawi lo turin kan lei kan veng (*keep*) tha tur a ni a, sual tlansan (*flee*) a, thil tha ti (*do*) tur kan ni. Remna hi a awm ngawt dawn lo va, mahni insen huamin a um a um (*pursue*) tur kan ni. Lalpan min en reng a, kan tawngtaina ngaithlain beng a chhi reng a ni tih hriat tur a ni. Pathian hmel hmuh hi ringtute tan lawmawm a nih laiin misualte tan chuan thinur, phuba la tur hmel a ni.

**Sawihö tur:**

1. Chhungkua-ah lu, *head* an awm a ngai kher em ni? Engvangin nge pasal zawk hi lu a nih kher ang?
2. Petera hian ringtute tawrhna hi thil thleng ve tur reng a ni a, Lalpa anga tuar inhuam tur leh amah anga tuar tur kan ni a tih laiin Pathian malsawmna dawng tura koh kan ni, a ti bawk a. Tawrhna leh malsawmna inzawmna, i tawn hriat atangan han sawi teh.

**ZIRLAI 7-NA**  
**ISUA ANGA THIL ƧHA ATANA TUAR**  
**(1 PETER 3:13 – 4:6)**

**Isua avanga thil Ƨha ti chung a tuarna:** Thil kal hmang pangngaiiah chuan thil Ƨha titu chu chawimawiin an awm a, ngaihlut an hlawh a, an nun entawnnin kan zir Ƨhin. Chutih rualin mi Ƨha tak pawhin felna, Ƨhatna avangin a tuar thei tho mai. Lal Isuan khawvela rawng a bawl chhung khan chawimawi aiin taksa leh rilru, thlarau thlenga tawrhna hun tam zawk a hmang tih kan hria a. Chutiang felna ti chung a tawrhna chu kan tan nunna a lo ni. Felna avanga tawrhna hi Kristian chuan a pumpelh lovang tih hriain chutiang tuarna chu lo thleng thei a ni tih Petera hian a hria a, mahse, hlau lo va mangang lo turin a fuih a ni (ch.14). Lal Isua'n tlang chung a thu sawiah pawh, "*Felna avanga tihduhdah tuartute chan Ƨhat thu,*" (Mt 5:10) a lo sawi tawh bawk a ni.

*"Krista avanga amah in rin chauh ni lovin, amah avanga in tuar pawh phal ani si a,"* (Phil.1:29) tia kan hmuh angin ringtu nun hian tuarna a keng tel tih kan hriat a pawimawh awm e. Chuvangin Isua Krista avanga thil Ƨha tih kawngah hian rawngbawltu ropui tak takte'n an lo tuar tawh Ƨhin a. Mahse chu chu an tawpna ni lovin, Isua avanga tuar ve tlak a ruat an ni chu an lawmna titamtu a lo ni zawk Ƨhin. Chuvangin Isua Krista avang chuan, "*thil Ƨha tih i ning sub ang u; kan inthlahdah loh zawngin a hun takah kan seng dawn si a,*" (Gal 6:9) tiin kan infuih Ƨhin tur a ni.

**Thil Ƨha lama thabnemngaih:** *Thil Ƨha lama thabnem in ngaih chuan in pawh khawih tu tur tu nge awm ang?* (ch.13) tiin Pathian thu kan hmu a, a thlamuanthlak hle mai. He lai thua '*thabnemngaih*' a tih hi, Ƨhatna ban san hauh lo va, nunna thupui bera neih tlat te, thudik leh thil Ƨhatna tura din tlat, a Ƨul chuan nunna hial pawh chan ngamna te a huam vek a ni. Hei hi Isua Krista kawng zawh kha a ni a, chutiang tuarna chu a lo awm pawhin, taksa tihluma chumi hnua engmah dang ti leh thei tawh lote

chu hlau lo turin Isuan amah zuitute (ringtute) chu a fuih zawk a ni (Luka 12:4).

**Thil þha ti tura kohte kan ni:** Thil þha sa va chhunzawm mai hi chu ringtu nawlpui hian kan ti ve thei mai a. Mahse, thil chhe tawh leh þha tawh lo siam þat leh tun din lehna kawng erawh chu mi nazawng hian kan tlin lo fo þhin. A chhan chu he kawngah hian tuarna, channa, ralna te a a awm vang a ni. Thil þha sa a ni emaw, þha tawh lo emaw, thil chhe tawh thlenga siam þha tura rawngbawlna kalpui tura beisei kan nih hi ringtu chuan a hriat thar fo a pawimawh em em a ni.

Pathian thu-ah chuan, “*Thil þha ti atan Krista Isuaah chuan siama awmin, ama kutcbhuak kan ni si a, chu thil þha tih chu kan awmna turin Pathianin a buatsaih lawk a ni,*” (Ephesi 2:10) tiin kan hmu a. He thu hi mihring atira siam a nih thu kha nilo vin, Kristaa a siam tharna thu a sawina a ni a, siam thara kan awmna chu chhandamna kan chan hi a ni. Mihring lam tih vang a ni lova, siam thartu chuan a siam thar mihring te nunna chu eng dinhmunah pawh Isua Krista avang chuan thil þha tia, nun hmang turin a duh a, chu chu kan nih dan tur leh kan awm dan tur chu a ni.

### **Sawihho tur:**

1. Thil þha tih kawngah hian þhahnem ngai taka ti þhin niin kan inhria em? Eng kawngah nge hmasawn kan mamawh nia kan hriat?
2. Thil þha tih hi kan awmna tur a nih mek laiin, kan duh loh zawk kan ti leh þhin a, hemi lak aþanga kan fihlim theihna tur nia kan hriat sawi ho teh ang.

**ZIRLAI 8-NA**  
**KRISTIAN NIH VANGA TUAR**  
**(1 PETERA 4:7-19)**

**Kristianna leh tuarna:** “*Kristian*” tih hi Krista zuitu tihna ani a, hetih hunlai (AD 63 leh 64) hian hmuhsitna ṭawngkama hmang an awm a nih a rinawm. Ringtu hmasate aṭanga tuarna awm mek zel a ni (ch.16). Petera ngei pawh, “*Isua hming avanga mualpho tlaka ruat a lo ni tarwb,*” (Tirh 5:41). AD 94-a Neroa’n Kristiante a tihduhdah ṭum khan Petera pawn a nun a chan ta ni a ngaih a ni. Kristian tam zawk hian Isua Krista rin avanga nunna chan khawp tuarna (*martyrdom*) kan tâwk kher lo ang. Amaherawhchu, rawngbawlna, hnathawhna, zirna, nitin nuna Isua Krista rinna avanga harsatna – taksa, rilru leh thlarauvah kan tawh hun a awm tih chu a hrechiangtute kan nih ṭheuh a rinawm. Tin, thil diklo titute avanga tawrhna kan hmachhawn a ṭul hun pawh a awm thei awm e. Chutih rualin Isua Krista zui hi tuarna hlir hmachhawn tur leh rah beha awm reng tura kohna a ni lo. Kristian nuna tuarna kan tih hian hel tuar ngawr ngawr tura Kristian te hi buatsaih kan ni hek lo. *Krista hming avanga hau in nih chuan in eng a thawl e* (ch. 14) tih a ni zawk. Pathian nung kan hnena awm reng kan nei hi a hluin a thlamuanthlak em em a ni. Chuvangin tuarna reng reng Pathianin rem a tiha Kristiante chung a lo thleng a nih pawhin thil sual tih avanga tuar ai chuan, Krista avanga tuar chu a hlawkin ringtu hmasaten an lo thlang zawk ṭhin a ni (Heb 11:15,16).

**Tuarna hi Pathian inpuan chhuahna leh fiahna a ni thei:** Tuarna kan tih hian Isua Krista rin avangte, amah kan zui avanga taksa, rilru, thlarau, thlenga tuarnate a huam thei vek awm e. Tuarna hi va cho ngawt erawh kan tih tur a ni lo. Kristian kan niha Krista hming avanga tuar ve kan nihnaah chuan lawm zawk tur kan ni. “*Krista tuarnaah te tuarpuitute in nih avangin lawm zawk rawh u,*” (1 Pet 4:13) tih ang hian. Hei hi khawvel thlirna aṭang chuan hriatthiam theih a ni lo. Tuarna hi rangkachak meia fiah a nih anga kan rinna fiahna leh tihchakna

hmanruaah Lalpan a hmanng fo mai. Amah rinna avanga a tuarna te  
ṭawmpuina chu, hremna lam aiin thil duhawm a ni zawk. Chu chu amah  
Krista nena tuar dunna leh a ropui inpuanchhuahna kawng a ni ṭhin.  
Chutianga tuarnaah chuan Pathian awmpuina ringtuin a chang tih  
Stephana chungchangah kan hmu (Tirh. 6:15). Tuarna dinhmunah hian  
Thlarau nun ṭhan lenna a awm a, Pathian khawngaihna leh hmangaihna  
tilang Chiangtu a ni fo ṭhin.

**Tuarna leh malsawmna:** Kristian kan niha Krista hming kan put avanga  
tuartir kan nihnaah chu nihlawhna dinhmun leh malsawmna kawng a ni  
thei. Pathian thu-ah, “*Krista hming avanga hau in nih chuan in eng a  
thawl e; Thlarau ropui tak, Pathian Thlarau chu in chungah a awm si a,*”  
(ch.14) tih kan hmuh ang hian. Hetiang tho hian Matthaia 5:11-12-ah,  
“*Miin keimah avanga an hau che u a, an tihduhdah che u a, dawt tinrenga  
an hek hunah che u, in eng a la thawl ang. Lawm ulangin nasa takin blim  
rawh u; vanah in tan lawman a awm hnem si a*”, tih kan hmu baw. Krista  
avanga tuarna chu thil lawmawm leh chawimawina thlen theitu a nih  
laiin; ringtute chu tualthat, rukruk, thil tisualtu, midangte thiltih  
relsaktu (ch.15) tia a sawi sualna chi hrang hrang hi ti lo turin leh  
chutiang avanga tuarna pumpelh turin min hrilh thung a. Heng hian  
Kristian hming a ti hliau a, midang a hnar a, ringlotute tan sawichhiatna  
remchang a siam ṭhin. Hetah hian *midangte thil tih relsaktu* tih hi “mi  
tibuaitu” tih nen thuhmun a ni a, mahni kuang lo nawr, midang thil a  
inrawlh tihna te a ni thei. Amaherawhchu, dikna avanga tuar erawh chu  
zak suh se (ch.16) tih kan hmu a ni.

Tuarna avang hian Pathian laka vui mai a awl laiin tuarna a lo awmin  
ringtu chuan a siamtu Pathian chu a bel hnai sauh zawk tur a ni. Lal Isua  
angin Pathian hnenah a inkawltir zel tur a ni (Lk 23:46). “*Tupaṭh a nun  
humbim duh apiangin a chan ang a, tupaṭh keimah avang leh Chanchin  
Ṭha avanga nun chan apiangin a humhim ang*” (Mk 8:35) tih hi hre reng  
ang u.

**Sawihō tur:**

1. Kristian nun hi tuarna hliir nge malsawmna nena kal dun tur nia kan hriat?
2. Krista zuina kawnga kan tuar vena te sawi ila, chumi avanga Pathian hnathawh kan hmuh te sawi ho teh ang.

**ZIRLAI 9-NA**  
**PATHIAN BERAMTE LEH BERAMPU**  
**(1 PETER 5:1-4)**

**Pathian beramte:** Thuthlung Hlui hunah chuan Beramte hi Israel fate sawinan hman a ni thin a (Eze 34:11-31). Tin, Thuthlung Thar hunah chuan ringtu hmasa te, Pathian mite, amah zuitute anga sawi an ni thung a (Mat 10:16). “*Paʼwl tlemte u, blau sub u,*” (Lk 12:32) tiin kan hmu bawk. Hei hian khawvela hnam zawng zawng tieng tur chu Kohhran hi a ni tih a rawn tilang a. Chu Kohhran lo ñiak chho, mi tlemte chu Lal Isua’n *paʼwl tlemte u* tiin a sawi a ni. Chu’ng pawl tlemte (Isua zuitute) chu mahni tâl tâla tâl mai tur ni lovin, beram anga pawlhoa awm tur an nih zia kan lo hre thei a. Johana 10:16-ah Lal Isuan beram huang danga beramte pawh a la rawn hruai tur thu leh pawl khata an awm ho tur thu a sawina kan hmu bawk a ni.

Beram hi ran, a ruala awm khawm ðhin, thuawih leh nunnem tak an ni a; Pathian thu ringtute sawi nan a hman hi a inhme hle a ni. Amah ringtute chu Thuthlung Hlui aţang tawhin Pathian chuan a humhalh em em a, an thlavang hauh pawh a tina hle tih Israel fate chungchangah kan hre thei awm e. Chutiang chuan Thuthlung Hlui leh Thuthlung Thar lam Kohhran rawn ñiak tir te chauh ni lovin, tuna ringtute (amah zuitute) thlenga Pathian Beramte huangah telh ve kan ni ta hi kan vanneiin, he dinhmun hi a va ropui em! Kan Pathian rilru put zia chu amah ñihtu (beram) te chungah a la pangngai reng a, “*a vantirhkoh chuan a awm chilh a, a chbanhim ðhin,*” (Sam 34:7) tih kan hre thei a ni. Chuvangin Pathian thlirna aţanga a beramte dinhmun hlutzia hi hre rengin, thuawih leh inngaitlawm taka Berampu ðha Lal Isua thu hi zawm tlat turin i inbuatsaih zel ang u.

**Berampu ðha dinhmun:** Amah Lal Isua’n, “*Kei Beram vengtu ðha ka ni,*” tiin min hrilh a (John 10:11). Hei hian beram vengtu ðha Isua chu a beramte – a mawhpurhnaa inngat ringtute – enkawlna kawngah

mawhphurhna hlen chhuakin a enkawl tih a kaw k a. Ringtute kaihrui, chawm leh kawng tinrenga ngaihsak a huam vek ang. “*In zinga Pathian pawlho awm*”, (ch.2) tih hi beramte enkawl turin mawhphurhna huang chungnga awm tihna a ni a, chumi enkawl hna atana rilru put dan tur chu, pawn lam thila dan anga phutna vanga tih emaw, Office hna anga hun bik nei chungga thawh ang a ni lo va. Pathian thu anga Pathian duh zawnga Berampu Tha Lal Isua duh zawnga thawh tur a ni. Tunlaih chuan berampu hi hlawh phu taw k nen kohhranin a rawih pawh a ni thei a. Tin, rawih loh kohhran enkawl tura nemngheh (Upa) dinhmun pawh a huam thei awm e. Tin, Upa dinhmun hi Israelte zingah Mosia hunlai atanga intan tawh a ni a (Num. 11:16-30). Hetah hian rorelna dinhmun chelh tur an ni thin. Tin, Upa tih leh hotu tih kan hmuh te (Tirh. 20:28) hi a mihring leh rawngbawl hnaah pawh hman pawlhna lai a awm. Paula’n Ephesi Upate a thlahnaah pawh, “*Pathian Kohhranbo ama thisena a leite chu chawm turin nangmahni leh in hote chungga chuan fimkhur rawh u, Thlarau Thianghlimin an chungga hotuah a siam che u hi,*” (Tirh. 20:28) tiin kan hmu. Kohhrantina rorelna chelhtu Upa dinhmunah chuan Petera a indah ve a, ‘*Tirhkok*’ intih aia Upa a han inchhal hian a inngaihtlawmna nasa tak a tilang a ni (ch.1).

He dinhmun hi mahni tanghma haina emaw, duhamna avanga sum umna emaw, mahni tana dinhmun leh hming mawina zawwna kawng a ni lo. “*Rilrua duh tak zawkin rawngbawl hna chu thawh tur a ni*” (ch.2). Ringtu enkawl naa berampu hna thawktu chu khawvel thila dinhmun atanga rilru inngaihtuah sanna, midang hmuhsitna nun, nelawm lo leh mite chungga intihlal aiin inngaihtlawmna nena kalpui a pawimawh a ni. Hei hi a hna kalhmang tak pawh a ni reng a, rawngbawl hnaah neitu a awmin, a hna chu a ta a ni lova, a neitu ta a nih zawk avangin a neitu thu leh duh danin a awmin, a thaw k tur zawk a ni ang. (1 Petera 5:4)

**Diabola laka fimkhur a pawimawh:** 1 Petera 5:7-ah chuan Pathianin a mite (beramte) chungchanga mawhphurhna a nghah thin zia leh a phurh zawh zia a lanna chiang tak kan hmu a. Keini’n harsatna leh phurrit nia

kan ngaihte leh manganpui thinte thlenga min phurh zawh sak zia hi kan ngaihtuah ngai em le? Amah Lal Isua'n, "*Keiman ka chawlh tir ang che u,*" tih min hrilh a (Mat.11:28). Hei hi Pathiam beramte (ringtute) chanvo a nih mek laiin, ringtu chu mawhphurhna engmah nei ta reng reng lo a ni si lo. "*Ngaihven ula fimkhur rawh u, in khingpui Diabola chu sakeibaknei rum thin angin a ei theih zawngin a phi ruai thin,*" (ch.8) tiin kan hmu a ni. Ringtu chuan ngaihven leh fimkhur a, inring renga awm a pawimawhzia kan hriatreng a ngai. Diabola'n ringtute a beih fona chu mihring pawn lam thil hmangin emaw, mihring tisa chakna sualte hmangin emaw a ni thei. Chumi lakah chuan, "*Rinnaah chuan ding nghet tlat a, amah chu do,*" (ch.9) turin Petera hian fuihna thu a sawi a ni. Setana hmanrua, kulh nghet tak ang maia mihringa awm chapona hi tihchim zel a pawimawh hle awm e. Jakoba 4:6-ah, "*Pathianin mi chapote a dodal a, inngaitlawmte erawh chu khawngaihna a pe thin,*" tih Pathian thu kan hmuh ang hian chapona te kalsanin tlawmna nun hmang tura inbuatsaih a pawimawh em em a ni.

### **Sawihō tur:**

1. Zirlai a kan hmuh bak Berampu leh Beramte dinhmun leh awm dan tur ni a kan hriat sawihō ni se.
2. Diabola'n ringtu min beih theih dan kan hriat te leh chumi laka kan fimkhurna tur kawng ni a kan hriat te zau takin sawi ho teh ang.